

In med sur dal rumantsch per na RumantschAs

La Pro Svizra Rumantscha ha lantschà in grond project

■ (anr/gc) **La Pro Svizra Rumantscha (PSR), fundada 1992, ha cuntanschì ses intent 1997 cun la realisaziun da La Quotidiana. Malgrà quai è ella s'engaschada vinavant, na be per la gasetta rumantscha dal di, mabain era cun diversifitgar ses radius d'acziun.** Dapreschent ha ella concentrà ses sforzs – segund la devisa: Far punts entaifer la Rumantschia e vers anor – sin la realisaziun d'in med d'instrucziun per il stgalim superiur da la scola primara e dal gimnasi davart il linguatg e la cultura rumantscha. Quest atun po ella puspè realisar in seminari davart il linguatg schurnalistic. Era ponderescha ella d'edir in nov prospect davart ses intent e sias activitads. Tant il rapport sco il quint per 2003 èn vegnids sancziunads da la radunanza da l'uniun PSR da sonda passada a Cuira che ha era reeligì la suprastanza per in ulteriur trienni.

Sin buna via a la realisaziun

Sco quai ch'il president da la PSR, *Arno Berther*, Sedrun, ha constatà en ses rapport, è la suprastanza sa decidida dad edir in nov med d'instrucziun davart lingua e cultura rumantscha. Destinà è quest per scolars na rumantschas. L'intent è d'infurmar e sensibilisar davart il rumantsch. In tal med manca e l'interess persuerter exista. Oravant tut classas che vegnan en terra rumantscha per champs e

scolaziun giavischian in tal musavia.

L'onn passà è il concept per quest med vegnì elavurà. Ins quinta cun custs da 120 000 francs (senza la stampa). Il chantun Grischun ha dà grond sustegn cun ina contribuziun da 90 000 francs. Uschia han ins pudì segirar la lavur redacziunala. Era dal departament da didactica da l'universitad da Friburg era vegnì empermess agid. Ordlunder n'è deplorablmain vegnì nagut. Uschia è l'entira responsabladad restada tar la suprastanza da la PSR. Quella furma ina gruppa cun trais commembers per la redacziun, la controlla dals meds e tegna en egl la dumonda da la ediziun, eventualmain era da cuminanza cun ina chasa editura.

Il med duai cumparair en tudestg cun era prender en vista traducziuns per franzos e talian. La tematica sa basa sin otg divers moduls davart maioritad e minoritad, bilinguitad, migraziun, curs da rumantsch eav. La lavur da preparaziun vul ins terminar fin l'onn 2005.

Ulteriurs projects

Insaquants onns ha la PSR organisà mintgamai l'atun in seminari schurnalistic. 2003 n'è quai betg stà il cas. Per quest onn vegn annunzià in curs davart il linguatg schurnalistic. – Sco med da far enconuschenta la PSR vegn edì in prospect. Era vul ins tshertgar novs commembers,

dar sustegn efficient a LQ ed è satisfatg da la buna collavuraziun tranter la gasetta dal di e l'Agentura da novitads rumantscha (anr). Lezza era vegnida realisada a sias uras era cun agid da la PSR.

Il quint da la PSR per 2003 sera cun in gudogn da 1300 francs tar entradas da 23 900 ed expensas da 22 600 francs. Il preventiv per 2004 è pli aut. El quinta cun entradas e sortidas da pli che 53 000 francs ed in pitschen avanzament da 300 francs. La summa gronda, numnadamain 40 000 francs, è prevista per il nov med d'instrucziun. Las contribuziuns restan sco fin uss: 30 francs per singuls commembers, 50 per conjugals e 120 per personas giuridicas. Quai duess purtar entradas da radund 12 000 francs.

Tschernas

Sco president per in ulteriur trienni vegn *Arno Berther*, Sedrun, tshernì e sco vice *Duri Denoth*, Ftan. En suprastanza vegnan confermads: *Silvia Demarmels-Candreja*, Salouf; *Christian Buser*, Mellingen; *Werner Carigiet*, Dardin e *Reto Pedotti*, Ftan. Sco nov suprantant vegn *David Carigiet*, Glion, elegì per *Manfred Veraguth*, Vuorz, che veva demissionà. – Sa retratga è *Annamaria Elmer-Cantieni*, Landquart, sco revisura. Ella vegn remplazzada da *Francesca Cajacob*, Mustér, fertant che *Carl Caflich*, Trin, vegn reelegì sco revisur.



Il president da la PSR, **Arno Berther** (san.) ed il vice, **Duri Denoth**.